

SeSotho



VICTORY OR DEATH



IMANIFESTO

MANIFESTO OA LIKHETHO TSA
PUSO EA LEHAE TSA 2026

VOTE EFF





A. SELELEKELA SA MOPRESIDENTE LE MOLAOLI E MOHOLO

Likhetho tsa puso ea lehae tsa 2026 ke e 'ngoe ea linako tsa makhaola-khang ka ho fetisisa nalaneng ea demokrasi ea rona. Batho ba rona ba tobane le tlokotsi e ntseng e hola ea puso, ho hloleha ha phano ea litšebeliso, tlhokahalo ea mesebetsi, bobolu, meralo ea motheo e putlamang le bomasepala ba lahlileng boikarabelo ba bona ba molaotheo. Ka hona, likhetho tsena ke teko ea hore na sechaba se tla tsoela pele ho mamella tšenyeho le ho hlokomolohua kapa se tla ema ho inkela bomasepala ba sona hape le ho khutlisetsa seriti pusong ea lehae.

Ka lebaka lena, re kena likhethong tsena tlasa mokotaba o reng: Tlhōlo kapa Lefu!

Polelo ena e totobatsa hore taba e potlakile ebile e ananela hore batho ba rona ba ke ke ba tsoela pele ho mamella maemo a bakiloeng ke lilemo tsa bobolu, ho hloka bokhoni, ho ratana ka maqhama, ho putlama ha moruo le ho haptjoa ha mebuso ea lehae ke bo-rakhoebo ba lithendara le batho ba matla ba hokahaneng le lipolotiki. Ho limilione tsa Maafrika Borwa, ho hloleha ha bomasepala ha se taba feela ea leano e hole le bophelo; ke 'nete ea letsatsi le letsatsi e amang phihlollo ea metsi, polokeho literateng, pokello ea lithōle, tlhokomelo ea litsela le seriti sa sechaba.

Economic Freedom Fighters ("EFF") e hlalisa manifesto ona e le leano la maano la ho pholosa puso ea lehae. O fana ka lenaneo le sebetsang le ka kenngoang tšebetsong, le tsepamisitseng maikutlo ho aheng bocha bomasepala ba sebeletsang batho ho fapana le borakonteraka le ba seng bakae ba khethiloeng. Manifesto o totobatsa hore bokamoso ba Afrika Borwa bo itšetlehile ka ho khutlisetsa bokhoni, botšepahi le semelo sa nts'etsopele sa puso ea lehae hore Afrika Borwa e boele e hahe liindasteri. Molao-motheo o ka sehloohong o tataisang maano ana ke hore bomasepala ba tlameha ho sebeletsa sechaba, eseng lithahasello tsa poraefete. Mehloli ea bomasepala e tlameha ho lebisoa phanong ea litšebeliso tsa boleng, tlhokomelong ea meralo ea motheo, tlhahisong ea mesebetsi le kholisong ea meruo ea lehae e tsitsitseng.

Bomasepala ba tlameha ho ba litsi tsa moralo, phano ea litšebeliso le nts'etsopele, ba sebelisa bokhoni ba bona ba kahare ho fapana le ho ba mecha ea bobolu le tšenyho ea lichelete.

Tšepo ea rona ea ho hlalisa manifesto ona ha e tsoe khopolong feela. E thehiloe boiphihlelong ba tšebetso le pusong e ipakileng. Hohle moo EFF e filong boikarabelo pusong ea lehae, re bontšitse hore mokhoa o mong oa puso oa



khoneha—mokhoa o thehiloeng boikarabellong, phanong ea litšebeletso, taolong e tiileng ea lichelete le boitlamong ho batho.

Ha lipolotiki tsa mebuso ea kopanelo li ntse li hola, EFF e bile boemong bo ikhethang pusong ea lehae. Leha e sa laole bomasepala ka botlalo kamehla, re sebelisitse tšusumetso ea rona ho netefatsa hore puso e sebeletsa batho. Bomasepaleng ba fapaneng ho pholletsa le Afrika Borwa, EFF e sebelisitse boteng ba eona makhotleng ka mokhoa o tsitsiseng ho pepesa bobolu, ho thibela tšebeliso e senyang lichelete, ho batla boikarabelo ho batsamaisi ba bomasepala le ho buella lithahasello tsa baahi ba tloaelehileng.

Liketho tsa 2026 ke motsotso oa bohlokoa o tla bopa bokamoso ba mebuso ea rona ea lehae lilemong tse tlang. Li tla thusa ho etsa qeto ea hore na sechaba se tla tsoela pele ho tobana le mathata tlasa bomasepala ba putlamang kapa tsela e ncha e ka fumanoa. Liketho tsena hape li tla etsa qeto ea hore na mehloli ea sechaba e tla tsoela pele ho ruisa baeletsi le bo-rakhoebo ba lithendara kapa qetellong e lebisoe ho khotsofatseng litlhoko tsa batho.

Nalane e re bontšitse khafetsa hore phetoho e nang le moelelo e khoneha feela ha batho ba tloaelehileng, ba banyanyane le ba baholo, ba kopana 'me ba sebelisa matla a bona a demokrasi. Ka hona, manifesto ona hase tokomane ea leano feela. Ke boipiletso bo tsoang pelong ba hore ho nkoe khato, hape ke memo e bulehileng ho sechaba hore se kenelle ho aheng puso ea lehae bocha.

Tlhōlo kapa Lefu!

B. SELELEKELA

EFF e kena Likhethong tsa Puso ea Lehae tsa 2026 e le mokhatlo oa phetohelo o holileng le o nang le boiphihlelo, o bileng le seabo pusong ea lehae ka lilemo tse fetang leshome. Lena ke lekhetlo la boraro EFF e qothisana lehllokoa Likhethong tsa Puso ea Lehae ho tloha ha e thehoa, kamora Liketho tsa Puso ea Lehae tsa 2016 le 2021.

Ka ho aha holim'a motheo o matla le boiphihlelo ba lilemo tse 13 tsa EFF Palamenteng ea Naha, Makgotleng a Ketsamolao le Makhotleng a Bomasepala, Manifesto ona hase feela polelo ea boitlamo bo bocha. O aha holim'a motheo oa dimanifesto tsa nakong e fetileng tsa EFF tsa liketho tsa puso ea lehae, manifesto oa motheo le liqeto tsa National People's Assembly (NPA) ea 2024.

Manifesto ona ke ntlafatso le nchafatso ea boitlamo ba EFF ba nako e telele. O thehiloe melao-motheong ea lipolotiki ea mokha le boiphihlong ba tšebetso



boo o bo fumaneng ka lilemo. Litho tsa EFF li sebelitse e le makhanselara, litho tsa likomiti tsa bomayara bomasepaleng ba bang ba litoropo tse kholo ka ho fetisisa Afrika Borwa, balulasetulo ba likomiti tsa makhotla a bomasepala, baemeli ba bolebeli le baitseki ba sechaba ho pholletsa le naha. Manifesto o bontša lithuto tseo EFF e ithutileng tsona, katleho e fihletsoeng le mathata a ntseng a lokela ho rarolloa hore puso ea lehae e ahoe bocha.

Bomasepala ba Batho tlasa puso ea EFF ba tla amohela Lenaneo la Ts'ebetso le bontšang ka 'nete maemo a bona a ikhethang a lehae le lintho tse tlang pele phanong ea litšebeliso. Manifesto ona o fana ka moralo oa naha o tla tataisa mosebetsi oa Bomasepala ba Batho le makhanselara a EFF. O hlalosa tekolo ea rona ea puso ea lehae kajeno mme o beha boitlamo ba rona ba ho aha bomasepala ba nang le bokhoni, ba nts'etsopela le ba batho.

Manifesto oa Likhetho tsa Puso ea Lehae tsa 2026 o tsepamisitse maikutlo makaleng a latelang a bohlokoa:

- A. Boemo ba Puso ea Lehae Afrika Borwa Kajeno
- B. Lilemo tse Leshome tsa EFF Pusong ea Lehae
- C. Boitlamo ba EFF bakeng sa Puso ea Lehae
- D. Ho Rala Tekanyetso le ho Tšehetsa Bomasepala ba Batho ka Lichelete
- E. Qetello
- F. Kano ea Mokhanselara oa EFF.

C. BOEMO BA PUSO EA LEHAE AFRIKA BORWA KAJENO

Puso ea lehae Afrika Borwa e maqakabetsing a tebileng a ntseng a mpefala. Lilemo tse fetang mashome a mararo kamora ho fihla ha demokrasi, batho ba limilione ba ntse ba phela ntle le phihlello e tšepahalang ea metsi a nooang a bolokehileng, tsamaiso ea likhoerekhoere, motlakase o ka lefelloang, pokello e tsitsitseng ea lithōle le litšebeliso tse ling tsa motheo tsa bomasepala. Sechaba se tobana khafetsa le khaello ea metsi, ho khaoha ha motlakase, ho qhalana ha likhoerekhoere, litsela tse putlamang le meralo ea motheo ea sechaba e senyehang.

Puso ea lehae e fumana R110 bilione e abeloang ke Palamente selemo le selemo, empa ka lebaka la tsamaiso e mpe ea lichelete le bobolu, bomasepala ba hlotsoe ho fana ka litšebeliso tsa motheo le ho hlalisa mesebetsi e tsitsitseng.

Hona joale bomasepala ba sebetsa e le babokelli ba mekoloto, ba batla litefo tsa metsi, motlakase, pokello ea lithōle le litšebeliso tse ling ho batho ba sa



sebitseng, bafumanehi le malapa a matichere, baoki, mapolesa, masole, balebeli ba tšireletso le basebetsi ba bomasepala ba tobaneng le mathata a lichelete.

Ho latela Mohlahlobi-Kakaretso, bomasepala ba tlasa ANC, DA le IFP ba sentse R45.6 bilione selemong sa lichelete sa 2024/25. Bomasepala bana ba hloleha ho lefa likhoebo tse nyane, basebetsi ba bomasepala, Eskom, liboto tsa metsi le batho ba bang bao ba ba kolotang ka har'a linako tse behiloeng ke molao.

Bomasepala ha ba sa hira basebetsi ka kotloloho; ho e-na le hoo ba itšetleha ka barekisi ba basebetsi le likhamphani tsa bo-ramakena-lipakeng tse hokahaneng le boralipolotiki bakeng sa bokgoni ba setegeniki, boenjeneri, lichelete le tsamaiso. Ka lebaka leo, mekoti litseleng ha e lokisoa, ho qhalana ha likhoerekhoere ha ho rarolloe, dibaka tsa dipapadi ha di hlokomelwe, matlo ha a ahoe, meralo ya motheo ya metsi e senyehile mme ho na le dibaka tse ngata tsa ho lahla lithōle ntle le molao.

D. LILEMO TSE LESHOME TSA EFF PUSONG EA LEHAE

EFF e kene pusong ea lehae ka 2016 e le mokha oa lipolotiki o sa tsoa thehoa, o neng o ikemiselitse ho sebelisa makhotla a bomasepala ho ntlafatsa maphelo a batho ba tloaelehileng. Ho tloha qalong, makhanselara a EFF a ile a ikhetholla e le bahlabani ba sebete khahlanong le bobolu, basireletsi ba bafumanehi le babuelli ba phano ea litšebeletso.

EFF e na le makhanselara a 1 075 a emetseng bongata ba bomasepala ba 257 ba Afrika Borwa. Makhanselara ana a pepesitse bobolu, a loanetse phano ea litšebeletso mme a phehella khiri ea leruri bomasepaleng. Hape a loanetse metsi le motlakase oa mahala bakeng sa bafumanehi.

Makhanselara a EFF a loanne ka sebete khahlanong le bobolu le ho hloka bokhoni ha bomayara le batsamaisi ba bomasepala bomasepaleng ba bangata ho pholletsa le naha. Ka lebaka leo, bomayara ba 'maloa ba ile ba tlosoa ka katleho maemong a bona ka lebaka la bobolu, ho kenyeletsa Meyara oa ANC Ditsobotla Municipality, North West; Meyara oa DA Nelson Mandela Municipality, Eastern Cape; Meyara oa ANC Dr. JS Moroka Municipality, Mpumalanga; Meyara oa IFP Nongoma Municipality, KwaZulu-Natal; le Meyara oa ANC Steve Tshwete Municipality, Mpumalanga.



Mosebetsi o sa khathaleng oa Makhanselara a EFF lilemong tse 10 tse fetileng o hlahisitse katleho e ngata phanong ea litšebeliso, ho kenyeletsa empa e sa felle ho tse latelang:

1. EFF City of Ekurhuleni, Gauteng, e hlahisitse le ho tšehetsa litlhahiso tse neng li kopa mmasepala ho hira ka kotloloho le ka ho sa feleng balebeli ba tšireletso le basebetsi ba ho hloekisa ba fetang 150.
2. City of Ekurhuleni, Gauteng, EFF e ekelitse palo ea bajalefa ba hlohang ka 1 819, bao joale ba fumanang metsi a motheo, motlakase le litšebeliso tsa likhoerekhoere mahala.
3. MMC oa EFF oa Metsi le Likhoerekhoere City of Ekurhuleni, Gauteng, o ile a bula Illiliba Water Tower ea 2-megalitre Tembisa le Northmead Water Tower ea 5.5-megalitre, e leng tora ea metsi ea bobeli ka boholo Karolong e ka Boroa ea Lefatše.
4. EFF City of Ekurhuleni, Gauteng, e file malapa a macha a 2 016 motlakase ka ho phethela liteishene tse nyane tsa motlakase le ditransformer Clayville, Mayfield, Tokyo Phase 3, Tsakane, Kwa-Thema le Thokoza.
5. Makhanselara a EFF City of Tshwane, Gauteng, a loanetse ho khutlisetsoa mosebetsing ha basebetsi ba mmasepala ba 81 ba neng ba lelekiloe ka tsela e seng molaong.
6. Makhanselara a EFF City of Tshwane, Gauteng, a loanetse ho fallisetsoa ha bahlaseluo ba likhohola ba 500 ho tloha Mamelodi ho ea Leeuwfontein ka Tshitwe 2023.
7. EFF City of Tshwane, Gauteng, e pepesitse bobolu ba DA bo amanang le merero ea ho rekisa Pretoria West le Rooiwal Power Stations hammoho le Wonderboom Airport.
8. MMC oa EFF oa Tikoloho le Lithōle City of Tshwane, Gauteng, o ile a tlosa libaka tsa ho lahla lithōle ntle le molao Mamelodi Hostel, Soshanguve Station le Mabopane, pela Ngaka Maseko High School. EFF City of Tshwane, Gauteng, e hlakotse mokoloto oa metsi le motlakase oa R4.3 bilione bakeng sa malapa a bafumanehi a fetang 85 000.
9. MMC oa EFF oa Bophelo City of Johannesburg, Gauteng, o hahile ditlilini tsa dihora tse 24 ditownship tsa Westbury le Florida mme a nchafatsa ditlilini Zandspruit, Protea Glen le Naledi.
10. EFF City of Johannesburg, Gauteng, e fetotse Poortjie Centre hore e be setsi sa kalafo sa bahlaseluo ba tšebeliso e mpe ea dithethefatsi.
11. MMC oa EFF oa Polokeho ea Sechaba City of Johannesburg, Gauteng, o thehile JMPD Tactical Reaction Unit ho loantša botlokotsebe CBD.



12. Makhanselara a EFF Tswaing Municipality, Taung Municipality (Ward 4) le Madibeng Municipality (Di-ward 4 le 27) North West, a fane ka didiba le ditanka tsa Jojo.
13. Makhanselara a EFF Madibeng Municipality, North West, a tsamaisa kichine ea sopho letsatsi le letsatsi Ward 27 e fang malapa a bafumanehi dijo.
14. Makhanselara a EFF Ditsobotla Municipality, North West, a hlahisitse tshisinyo ea ho hloka tshepo, e ileng ea fella ka ho tlosoa ha Meyara oa ANC ea neng a le bobolu.
15. Makhanselara a EFF Taung Municipality, North West, a loanetse hore Lykso Informal Settlement e etsoe ya semmuso.
16. EFF Buffalo City Municipality, Eastern Cape, e emisitse ho heletsoa ha matlo ka tsela e seng molaong ke puso ea ANC seabakeng sa eBhongweni.
17. Makhanselara a EFF Buffalo City Municipality, Eastern Cape, a loanetse hore batho ba Ward 50 le dibaka tse e potolohileng ba fumane motlakase.
18. MMC oa EFF oa Motlakase le Eneji Nelson Mandela Bay Municipality, Eastern Cape, o ntlafalitse Motherwell Main Substation.
19. MMC oa EFF oa Tekanyetso le Polokelo ea Lichelete Nelson Mandela Municipality, Eastern Cape, o hlakotse mokoloto oa mmasepala oa R3.4 milione oa Ekuphumleni Old Age Home kamora ketelo le boitlamo ba Mopresidente oa EFF.
20. MMC oa EFF oa Tekanyetso le Polokelo ea Lichelete Nelson Mandela Municipality, Eastern Cape, o hlakotse mekoloto ea malapa a sokolang Central, KwaMagxaki, Kwadwesi, Motherwell le Blue Water Bay.
21. Makhanselara a EFF Big Five Hlabisa Municipality, KwaZulu-Natal, a file batho ba Ward 6 metsi ka sediba.
22. Makhanselara a EFF City of Cape Town Municipality, Western Cape, a loanetse ho phetheloa ha projeke ea phaephe ea metsi le meralo ea motheo ea litsela pela Gugulethu Housing Project.
23. Makhanselara a EFF City of Cape Town Municipality, Western Cape, a loanetse ho buloa hape ha Emthonjeni Swimming Pool Gugulethu.
24. Makhanselara a EFF Ehlanzeni District Municipality, Mpumalanga, a nolofalitse phetoho ea Elijah Mango College hore e be Ehlanzeni TVET College.
25. Makhanselara a EFF Thaba Chweu Municipality, Mpumalanga, a emisitse ho lelekoa ka tsela e seng molaong ha baahi ba mapolasing Di-ward 4 le 5 ke ANC.



26. Makhanselara a EFF Dihlabeng Municipality, Free State, a thusitse batho ba Ward 17 ho fumana metsi le motlakase oa mmasepala mahala bakeng sa malapa a bafumanehi.
27. Makhanselara a EFF Mafube Municipality, Free State, a nolofalitse kabo ea ditsha ke mmasepala.
28. Makhanselara a EFF Dihlabeng Municipality, Free State, a pepesitse bobolu ba mmasepala.
29. EFF Emthanjeni Municipality, Northern Cape, e buelletse ho potlakisoa ha ho ntšoa ha mangolo a beng ba matlo le mehato ea ho rarolla ho salela morao ha nako e telele ha ho ntšoa mangolo ana.

Ka katleho ena ea lilemo tse leshome tse fetileng, EFF e fumane boiphihlelo ba bohlokoa bolebeling le pusong. Ke motheong ona moo EFF e hlakisang boitlamo ba Bomasepala ba Batho.

E. BOITLAMO BA EFF

a) Bomasepala ba EFF ka Mobu le Moruo oa Temo

EFF e ananela takatso ea nako e telele ea batho ea ho fumana mobu, e simolohileng nalaneng, le ho hloleha khafetsa ha puso ea ANC ho rarolla taba ena. Nakong ea hanghang ho isa nakong e khutšoanyane, sepheo sa bomasepala bohle ba EFF ke ho fumana mobu ka mafolofolo bakeng sa bolulo, borapeli, khoebo le temo. Ho feta moo, bomasepala bohle ba EFF ba tla emisa ho rekisoa ha mobu oa mmasepala mme ho e-na le hoo ba o abele kabo bocha ho sechaba sa batho ba batšo.

Bomasepala ba EFF ba tla:

1. Sebelisa matla a bona a molao a ho nka thepa molemong oa sechaba ho nka mobu le meaho e lahliloeng, hore li fumanehe bakeng sa tšebeliso ke bacha temong le mesebetsing e meng ea khoebo.
2. Behella ka thoko pakeng tsa 5% le 10% ea mobu o abuoang bocha ka ho khethela bakeng sa batho ba phelang le bokooa, ka ho etellelsa pele tšebetso le lisebelisoa tsa temo tse fihlillehang.
3. Theha leano le hlakileng la lehae la ntlafatso ea mobu le kenyeletsang leano le kopaneng la nts'etsopele e tsitsitseng ea mahaeng. Leano lena le lokela ho tsepamisa maikutlo ho fokotseng bofuma ba mahaeng ka ho sebelisa mehloli e fumanehang ka boiqapelo libakeng tse reriloeng.
4. Etsa hore mobu o haufi le litsi tsa litoropo o fumanehe bakeng sa bolulo ba batho, e le ho rarolla tlhoko e potlakileng ka ho fetisisa ea ntlafatso ea mobu litoropong.



5. Kena Litumellanong tsa Kutloisiso le baetapele ba setso bakeng sa nts'etsopele ea mobu libakeng tseo ba nang le matla ho tsona, ka sepheo sa ho sebelisa mobu oa mahaeng ho susumetsa nts'etsopele e etelletsoeng pele ke bacha.
6. Sebelisana le dikholetjhe tsa temo tse haufi ho matlafatsa litšebeliso tsa boeletsi ba temo bakeng sa balemi ba mahaeng.
7. Theha litsi tsa mmaraka tseo e leng tsa mmasepala, moo balemi bohle ba ntseng ba hlaha ba ka tlisang lihlahisoa tsa bona 'marakeng o bohareng.
8. Haha selahelo sa liphoofole se bohareng seo e leng sa mmasepala, se reretsoeng haholo ho thusa balemi ba ntseng ba hlaha ho rekisa mehlafe ea bona.
9. Thusa ho fana ka ditokelo tsa metsi ho balemi ba ntseng ba hlaha mme o ba fe lisebelisoa tsa bohlokoa ho khothaletsa nts'etsopele ea temo libakeng tse kang Midvaal, Rand West City le Merafong Gauteng, hammoho le Dr Pixley Ka Isaka Seme le Nkomazi Mpumalanga.
10. Arola mobu ka likarolo tse nyane ho lumella temo e matla ea tekanyo e nyane, ho tšehetsa bacha ba bangata kamoo ho ka khonehang.
11. Tiisa phethahatso ea melawana ea kabo ea tšebeliso ea mobu ho netefatsa hore ha ho mobu oa temo o fetoleloang bolulo kapa mofuta o mong oa tšebeliso ea mobu.
12. Buisana le mafapha a fapaneng a Mmuso a nang le mobu bomasepaleng bana hore a fe mmasepala tokelo ea pele ea ho hana ha mobu oa Mmuso o rekisoa kapa o fetisetsoa. Sena se netefatsa hore mmasepala o ka fumana mobu o hlokaahalang bakeng sa matsapa a ntlafatso ea mobu boemong ba lehae.
13. Hlahlamanya le ho sebelisana le Communal Property Associations bomasepaleng bana ho fana ka koetliso le tšehetso ea kamora kabo ea mobu.
14. Hlahlamanya le ho khothaletsa diporojeke tsa nosetso e nyane mobung o fumanehang ho matlafatsa temo ea balemi ba banyenyane e mamellang phetoho ea tlelaemete, ka sepheo sa ho hlahisa bonyane mesebetsi e 500 ea bacha mmasepaleng ka mong nakong ea pele ea puso.



b) Bomasepala ba EFF ka Malapa a Fumanehileng le Litšebeletso tsa Motheo tsa Mahala

Bomasepala ba EFF ba tla:

1. Haha bomasepala ba netefatsang phihlello ea bohle ea litšebeletso tsa motheo e tšepahalang le e ka lefelloang, e le motheo oa seriti sa botho le ho nka karolo moruong.
2. Netefatsa hore malapa 'ohle a fumanehileng a tshwanelehang a fumana litšebeletso tsa motheo tsa mahala e le boikarabelo ba molaotheo le ba nts'etsopele.
3. Ngodisa ka boiketsetso baamohedi bohle ba dithuso tsa SASSA ba tshwanelehang le malapa a mang a hlohang nakong ya matsatsi a 90 kamora ho kena pusong, ka ho sebedisa ditsamaiso tse kopantsweng tsa mmasepala tsa batho ba hlohang, mme ho tloswe ditšhita tsa tsamaiso tse thibelang malapa a tshwanelehang ho fumana tshehetso.
4. Fana ka metsi a motheo, motlakase, tsamaiso ea likhoerekhoere le ho tlosoa ha lithōle mahala ho malapa 'ohle a hlohang, ho kenyeletsa a mek'hukhung, a matlo a ka morao le a metse ea mahaeng.
5. Hlakola mekoloto yohle ya kgale ya malapa a hlohang, kenya mananeo a tsosoloso ya mekoloto ho thibela ho bokellana ha mekoloto e metjha, mme o fedise ho kgaolwa ha ditshebeletso e le kotlo ho malapa a tshwanelehang.
6. Romela diyuniti tse tsamayang tsa mmasepala le basebeletsi ba setjhaba ka kotloloho malapeng a batho ba robetseng diphateng, maqheku le batho ba nang le bokooa bo matla ho ba ngodisa polokelong ya dintlha tsa batho ba hlohang, ntle le ho ba qobella ho ya diofising tsa mmasepala.
7. Beha bafetoleli ba koetlisitsoeng ba Puo ea Matsoho ea Afrika Borwa (SASL) litsing tsohle tsa bomasepala tsa tlhokomelo ea bareki.
8. Eketsa kabelo ea metsi le motlakase oa motheo oa mahala ho fihla maemong a tšehetsang ho pheha, ho futhumatsa, bophelo bo botle, seriti le mesebetsi e menyane ea moruo.
9. Kenya mehaho ya ditefiso e tswelang pele e sireletsang malapa a fumanehileng ha e ntse e netefatsa botsitso ba nako e telele ba ditjhelete tsa mmasepala.
10. Theha Dikopano tsa Tekanyetso tsa Batho tse thehilweng di-ward ho netefatsa hore setjhaba se nka karolo ka kotloloho bolebeding ba ditshebeletso tsa motheo tsa mahala, tshehetso ya batho ba hlohang le mehaho ya ditefiso.



11. Netefatsa hore lits'ebeletso tsa motheo lia tšepahala, li bolokehile ebile ke tsa boleng bo phahameng, mme phano ea litšebeletso e nkoe e le ntho ea pele ea nts'etsopela ho fapana le mosebetsi oa khoebo.

c) Bomasepala ba EFF ka Phokotso ea Litšenyehelo tsa Bophelo bakeng sa Malapa a Basebetsi le a Moputso o Mahareng

EFF e ananela hore ho phahama ha litšenyehelo tsa bophelo ha ho ame malapa a fumanehileng feela, empa ho ama le malapa a basebetsi le a moputso o mahareng. Matichere, baoki, mapolesa, baartisan, ditsebi le basebetsi ba bang ba bangata ba thatafalloa haholoanyane ke ho jara litšenyehelo tse ntseng li phahama tsa litšebeletso tsa bomasepala.

Ho tšehetsa malapa ana, bomasepala ba EFF ba tla:

1. Kenya mehato e lebisitsoeng ea tšehetso bakeng sa malapa a basebetsi le a moputso o mahareng a tobaneng le mathata a lichelete.
2. Fana ka phomolo ea nakwana ka ditefiso tse fetotsweng, dithuso tsa ditjhelete, dithulaganyo tsa tefo tse kgonehang le mananeo a mmasepala a phomolo ya mekoloto.
3. Kenya ditsamaiso tsa tlhokomediso ya pele tse sebedisang dintlha tsa ditefiso le ditefo ho hlwaya malapa a kotsing ya mathata a ditjhelete le ho kenella pele mekoloto o ka se hlole o laoleha.
4. Thibela ho bokellana ha mekoloto ya malapa e ke keng ya tswelapele ka ho kenella kapele, tshehetso ya ditjhelete le dithulaganyo tsa tefo tse utlwalang.
5. Netefatsa hore phihlelo ya mehato ya tshehetso ya mmasepala e bonolo, e na le seriti ebile ha e na dipampiri tse sa hlokalang.

d) Bomasepala ba EFF ka Bokhoni ba Kahare le ho Khutlisetsa Litšebeletso ka Hare

Bomasepala ba EFF ba tla:

1. Likhoeling tse 24 tse tlang, hira basebetsi ba mmasepala ka kotloloho ho fokotsa ho itšetleha ka barekisi ba basebetsi le lithendara bakeng sa mesebetsi ea bohlokoa ea mmasepala.
2. Haha ditsamaiso tsa bomasepala tse nang le bokgoni, tsa porofeshenale le tsa boitshwara, tse nang le baenjenere, barulaganyi, baartisan, batsamaisi ba ditjhelete, batsamaisi ba diofisi le ditsebi tse ding tse nang le mangolo a tshwanelehang.



3. Etsa hore ditsamaiso tsa bomasepala e be tsa porofeshenale ka ho hira ho latela bokgoni, mangolo a thuto, boiphihlelo le boetapele ba boitshwaro.
4. Theha bokgoni ba ka hare ba mmasepala ba ka ho sa feleng ho fana ka tlhokomelo, taolo ya dithole, tshireletso, ntshetsopele ya meralo ya motheo le ditshebeletso tse ding tsa bohlokwa.
5. Matlafatsa bokgoni ba moralo le taolo ya diporojeke ho netefatsa hore ditekanyetso tsa bomasepala, diporojeke tsa meralo ya motheo le mananeo a ntshetsopele ya moruo di hokahanngwa le ho kenngwa tshebetsong ka nepo.
6. Ntlafatsa taolo ya ditjhelete, pokello ya lekeno le ditsamaiso tsa tekanyetso ho netefatsa hore mehlodi ya mmasepala e sebediswa ka bokgoni mme e lebiswa phanong ya ditshebeletso.
7. Bokella tjhelete yohle e kolotwang bomasepala ke mafapha a mmuso, dikgwebo le bakoloti ba bang ba baholo, ha ho ntse ho sireletswa malapa a fumanehileng.
8. Fetola ditsamaiso tsa ditheko ho fedisa bobodu, ho qhekella le tshenyo ka ditsamaiso tse pepeneneng, tse hlohang leeme le tse nang le boikarabelo.
9. Phatlalatsa dithendara tsohle, dikabo le dikonteraka, phethahatsa ditlamorao tse tiileng bakeng sa bobodu mme o behe lenaneng le thibetsweng dikhamphani le batho ba fumanweng ba le molato wa diketso tse fosahetseng.
10. Sebedisa ditheko tsa mmasepala ho tshehetsa ntshetsopele ya moruo wa lehae, tlhahiso ya mesebetsi, dikoporasi, di-SMME le dikgwebo tsa ditownship.
11. Netefatsa hore ditshebeletso tsohle tse kgethehileng tse ntshitsweng kantle di kenyeletsa phetiso ya bokgoni le mananeo a ho aha bokgoni ho matlafatsa matla a mmasepala.
12. Ntjhafatsa tsamaiso ya mmasepala ka phetoho e feletseng ya dijithale ya ho lefisa, tlhokomelo ya bareki, taolo ya ditletlebo, diphefuti, dilaesense, dikgokelo tsa ditshebeletso le ditsamaiso tsa mosebetsi wa ka hare.
13. Theha puso meahong e thehilweng setjhabeng ka dikopano tsa ka mehla tsa boikarabelo tsa di-ward, ditsela tsa maikutlo mabapi le phano ya ditshebeletso, diforamo tsa moralo o kopanetsweng le ditsi tse fihlillehang tsa mmasepala tsa ditshebeletso tsohle seabakeng se le seng.
14. Kenya dipheo tse hlakileng tsa tshebetso, ditsamaiso tsa ho beha leihlo le mehato ya boikarabelo bakeng sa basebetsi ba mmasepala, botsamaisi bo phahameng le boetapele ba mmasepala.



e) Bomasepala ba EFF ka Mesebetsi le di-SMME

EFF e ananela hore bomasepala ba na le bokgoni bo boholo ba ho hira basebetsi, ho hlahisa mesebetsi le ho kgothaletsa ntshetsopele ya moruo wa lehae, ha ba ntse ba aha bokgoni ba ka hare ba ho fana ka ditshebeletso ka bokgoni. Bomasepala ba EFF ba tla sebedisa bokgoni bona ho hlahisa mesebetsi, ho fokotsa tlhokeho ya mesebetsi, ho matlafatsa bokgoni ba mmasepala le ho kgothaletsa kgolo ya moruo wa lehae e kenyeletsang bohle.

Bomasepala ba EFF ba tla:

1. Khutlisetsa tshireletso, ho hlwekisa, pokello ya dithole, tlhokomelo le ditshebeletso tse ding tsa motheo ka hare ho mmasepala ho hlahisa mesebetsi ya leruri.
2. Theha diyuniti tsa baartisan ba mmasepala bakeng sa diphaephe, motlakase, tlhokomelo ya ditsela, kaho le tokiso ya meralo ya motheo, ho tsepamisitswe maikutlo ho hireng basadi, batjha le baahi ba lehae.
3. Kenya mananeo a mmasepala a boithutelo ba mosebetsi, di-internship le ntshetsopele ya bokgoni a hokahaneng le phano ya ditshebeletso, meralo ya motheo le diporojeke tsa tlhokomelo ho hlahisa mesebetsi e metjha.
4. Haha meruo e matla ya lehae ka ho tshehetsa di-SMME, dikoporasi, dikgwebo tsa ditownship le barekisi ba seng molaong ka menyetla ya ditheko, tshehetso ya dikgwebo le phihlello ya mebaraka dibakeng tse kang uMzumbe Ward 19 KwaZulu-Natal; Musina, Lepelle-Nkumpi, Phalaborwa le Ephraim Mogale Limpopo.
5. Ntlafatsa le ho atolosa Tshakhuma Market hore e be setsi sa sekwalejwale sa kgwebo le ho sebetswa ha dihlahiswa tsa temo.
6. Abela bonyane 80% ya ditheko tsa mmasepala ho di-SMME tsa lehae, dikoporasi le dikgwebo tsa ditownship tse amehang mesebetsing ya moruo e amanang le tlhahiso.
7. Etsa kgwebo e seng molaong hore e be ya semmuso le ho e tshehetsa ka ho fana ka dibaka tsa kgwebo, dibaka tsa polokelo, metsi, tsamaiso ya dikgwerekgwere, motlakase le melawana e tshehetsang.
8. Theha ditsi tsa tshehetso tsa mmasepala ho fana ka ngodiso ya dikgwebo, tshehetso ya ho latela melao, boeletsi, tshehetso ya ditjhelete le phihlello ya mebaraka bakeng sa dikgwebo tse ntseng di hlaha.
9. Theha mebaraka ya mmasepala, dibaka tsa polokelo, meralo ya motheo ya ketane e batang le ditsi tsa dipalangwang ho hokahanya bahlahisi ba



banyenyane, barekisi, dikoporasi le dikgwebo tse seng molaong le mebaraka e tsitsitseng.

10. Theha ditsi tsa diindasteri ditownship le mahaeng ho tshehetsa tlhahiso, ho sebetswa ha dihlahiswa tsa temo, ditshebeletso le tlhahiso ya lehae.
11. Kenya babokelli ba dithole le dikgwebo tse ding tsa setjhaba ditsamaisong tsa semmuso tsa mmasepala ka tefo e hlohang leeme, mananeo a tshehetso le menyetla ya moruo e tsitsitseng.
12. Theha ditsi tsa boiqapelo le kgwebo tsa batjha tse fanang ka bokgoni ba dijithale, tshehetso ya kgwebo, disebediswa le menyetla bakeng sa dikgwebo tsa batjha.

f) Bomasepala ba EFF ka Dipapadi, Bonono le Setso

Bomasepala ba EFF ba tla:

1. Tlosa difika tsa mehla ya kgethollo, fetola mabitso a diterata, datoropo le dibaka tsa setjhaba tse tlotlisang bokolone le kgethollo, mme o di nkele sebaka ka mabitso le matshwao a bontshang nalane, bahale le ditabatabelo tsa batho ba Afrika Borwa.
2. Baballa le ho kgothaletsa nalane, setso le lefa la Afrika ka dimusiamo, dikgopotso, bonono ba setjhaba le ho theha difika tse tlotlang baetapele ba Afrika le ba neng ba lwantsha bokolone.
3. Haha, hlokomela le ho ntlafatsa dibaka tsa dipapadi, dilaeborari, diphaka, ditsi tsa boithabiso, disetadiamo le dibaka tse ding tsa setjhaba, haholoholo ditownship, mekhukhung le metseng ya mahaeng.
4. Netefatsa hore disetadiamo tsohle tsa mmasepala, diholo tsa setjhaba, matamo a setjhaba le ditsi tsa bonono di na le dirampi tse sebetlang, ditulo tse fihlillehang ka ditulo tsa mabidi le diphaposi tsa ho fetola tse loketseng.
5. Sebedisana le mekgatlo ya lehae ya batho ba nang le bokooa ho netefatsa hore ditabatabelo tsa dipapadi, bonono le setso tsa baahi ba nang le bokooa ward ka nngwe di a hlwauwa le ho etelletswa pele.
6. Netefatsa hore ward ka nngwe e na le dibaka tse bolokehileng tsa boithabiso, dijimi tsa kantle, meralo ya dipapadi le dibaka tsa setjhaba bakeng sa mesebetsi ya kahisano, setso le boithabiso.
7. Sebedisana le dikolo, mekgatlo ya dipapadi le mekgatlo ya setjhaba ho atolosa ho nka karolo dipapading, boithabisong, bononong le setsong, haholoholo hara batjha, basadi le batho ba nang le bokooa.
8. Tshwara diketsahalo tsa dipapadi, setso le lefa kgafetsa ho kgothaletsa kopano ya setjhaba, talenta ya lehae le ho nka karolo ha setjhaba.



9. Theha matlole a mmasepala a bonono, setso le lefa ho tshehetsa bataki, dibini, baetsi ba difilimi, bangodi, baphethi le basebetsi ba bang ba boiqapelo.
10. Tshehetsa bataki le dikgwebo tsa boiqapelo tsa lehae ka phihlello ya dibaka, disebediswa, koetliso, dipontsho tsa setjhaba, diketsahalo tsa mmasepala, mekete le menyetla ya ditheko.
11. Tshehetsa diteishene tsa radio tsa setjhaba, dikoranta tsa lehae le dipolathefomo tsa media tsa setjhaba e le disebediswa tsa ntshetsopele ya lehae, kabo ya tlhahisoleseding le pontsho ya setso.
12. Theha ditsi tsa bonono le setso, dibaka tsa setjhaba tsa merero e mengata le ditsi tsa boiqapelo ho tshehetsa tlhahiso ya setso, koetliso le ntshetsopele ya dikgwebo.
13. Kgothaletsa kgolo ya diindasteri tsa setso le boiqapelo e le bafani ba mesebetsi, ntshetsopele ya moruo, boiketlo ba setjhaba le thibelo ya botlokotsebe.
14. Tshehetsa tlhahiso ya lehae le dikgwebo tsa batho ba batsho dithekong tsa disebediswa tsa dipapadi, setso le boithabiso.
15. Netefatsa hore mananeo a dipapadi, bonono, setso le lefa a kenyeletsa bohle mme a fihlelleha ho basadi, batjha le batho ba nang le bokooa.
16. Sebedisa dipapadi, bonono, setso le lefa ho aha ditjhaba tse phetseng hantle, tse kopaneng le tse mafolofolo, ha ho ntse ho ntshetswa pele tokoloho ya moruo le ntshetsopele ya setjhaba.

g) Bomasepala ba EFF ka Tekatekano ya Bong, Polokeho le Ntshetsopele ya Setjhaba

Bomasepala ba EFF ba tla:

1. Qobella bonyane boemedi ba 50% ba basadi boetapeleng, botsamaising, khiri, menyetleng ya ditheko le mananeong a ntshetsopele ya moruo a mmasepala.
2. Theha Diyuniti tsa Tekatekano ya Bong le ditsela tsa ho beha leihlo ho netefatsa ho fihlellwa ha dipheo tsa tekatekano ya bong le ho hokahanya mananeo a matlafatsang basadi le banana.
3. Kenya tekanyetso e arabelang bong ho netefatsa hore mehlodi ya mmasepala e kenya letsoho ka kotloloho ntshetsopeleng ya basadi.
4. Kenya mananeo a lwantshang puso ya banna, kgethollo ya bong le tlhekefetso kgahlanong le basadi ka thuto, tlhokomediso, ho kgothaletsa setjhaba le ho kenya banna ka mafolofolo ntweng kgahlanong le tlhekefetso ya bong le polao ya basadi.



5. Sebedisana le baetapele ba setso, mekgatlo ya bodumedi, mekgatlo ya setjhaba, mekga ya setjhaba le ditheo tsa phethahatso ya molao ho kgothaletsa tekatekano ya bong le ho fedisa meetlo e kotsi e hatakelang ditokelo tsa basadi le banana.
6. Etelletsa pele basadi, haholoholo malapa a etelletsweng pele ke basadi, mananeong a mmasepala a matlafatso ya moruo, tshehetso ya batho ba hlohang, matlo le ntshetsopele ya setjhaba.
7. Hlahisa menyetla ya mesebetsi, ntshetsopele ya bokgoni, kgwebo le ditheko e lebisitsweng ho basadi makaleng ohle a moruo wa lehae.
8. Theha ditsela tse bolokehileng le tse fihlillehang tsa ho tlaleha tlhekefetso ya bong, tlhekefetso ya motabo, tshebediso e mpe le tlhekefetso, tse tshehetswang ke basebetsi ba phethahatso ya molao ba mmasepala le meaho ya polokeho ya setjhaba e koetlisitsweng hantle.
9. Tshehetsa baphonyohi ba tlhekefetso ya bong ka matlo a tshireletso, dibaka tsa polokeho, ditshebeletso tsa boeletsi le mananeo a tshehetso a thehilweng di-ward.
10. Sebedisana le Tshebeletso ya Sepolesa sa Afrika Borwa le meaho ya polokeho ya setjhaba ho lwantsha ho qobella batho ho lefa tjehelete, dikgoka le marangrang a botlokotsebe a hlaselang barekisi ba seng molaong, dikgwebo tsa ditownship, dibaka tsa kaho, ditsela tsa dipalangwang le ditjhaba tse tlokoising.
11. Hlomella diteishene tsohle tsa sepolesa sa mmasepala le matlo a tshireletso a tshohanyetso ka menyako e fihlillehang ka ditulo tsa mabidi, dirampi le diphaposi tsa poraefete tsa boeletsi.
12. Thibela batho le dikgwebo tse amanang le tlhekefetso ya bong, peto, tlhekefetso ya bana, tshebediso e mpe, ho qobella batho ho lefa tjehelete kapa botlokotsebe bo hlophisitsweng ho una molemo menyetleng ya ditheko tsa mmasepala.
13. Matlafatsa ditshebeletso tsa bophelo bo botle ba bomme, ba pelehi le tlhokomelo ya mantlha ya bophelo ka ditlilini tsa mmasepala tse nang le mehlodi e betere, basebetsi ba eketsehileng ba bophelo le mananeo a tshehetso a setjhaba.
14. Netefatsa hore meralo ya motheo ya mmasepala, ho kenyeletsa metsi, dikgwerekgwere, mabone a setjhaba, ditsela le dibaka tsa setjhaba, e ralilwe le ho hlokomelwa ka tsela e ntlafatsang polokeho, seriti le motsamao wa basadi.
15. Sireletsa ditokelo le seriti sa dihlopha tse tlokoising, ho kenyeletsa bana, maqheku, batho ba LGBTQIA+ le basebetsi ba motabo, ka ditshebeletso le mananeo a mmasepala a kenyeletsang bohle.
16. Tshehetsa dikoporasi tse etelletsweng pele ke basadi, diporojeke tsa temo, dikgwebo tsa ditownship le matsapa a mang a moruo a setjhaba ka thuso e lebisitsweng ya mmasepala.



17. Theha mananeo le matsholo a ho lwantsha dithethefatsi, boimana ba batjha, tlhekefetso ya bong le ho putlama ha setjhaba, ha ho ntse ho kgothaletswa tshehetso ya malapa, kopano ya setjhaba le tsosoloso ya boitshwaro.

18. Kenya matlwana a batho bohle le a sa kgetholleng bong diofising tsohle tsa mmasepala, dilaaboraring, ditsi tsa dipalangwang le dihlo tsa setjhaba.

19. Kenya matsholo a thuto le tlhokomediso dikolong le setjhabeng ka thibelo ya peto, tlhekefetso ya bong le ditsela tsa ho tlaleha tse fumanehang ho baphonyohi.

h) Bomasepala ba EFF ka Bophelo bo Botle

Bomasepala ba EFF ba tla:

1. Atolosa phihlello ya ditshebeletso tse felletseng tsa tlhokomelo ya mantlha ya bophelo, ho kenyeletsa bophelo ba motabo le pelehi, bophelo ba bomme, tlhokomelo ya HIV, bophelo ba kelello le tshehetso ya kelello le setjhaba.
2. Romela diyuniti tsa bophelo tse tsamayang le basebetsi ba bophelo ba setjhaba ho fana ka ditshebeletso, ditlahlobo, phetisetso le tlhokomelo ya ho sala bakudi morao mahaeng, dibakeng tse potolohileng ditoropo le ditjhabeng tse sa sebeletswang hantle.
3. Beha bafetoleli ba koetlisitsweng ba Puo ya Matsoho ya Afrika Borwa (SASL) ditsing tsohle tse kgolo tsa bophelo.
4. Koetlisa basebetsi ba kamohelo ditlilining, batsamaisi, baaki le basebetsi ba bophelo ba setjhaba ka ditokelo tsa batho ba nang le bokooa, puisano e nang le tlhompho le ditsela tse bolokehileng tsa ho tsamaisa mmele.
5. Fedisa mela e melelele bakeng sa bakudi ba tlotsing ka ho kenya mela e tlamang ya bohlokwa ditlilining le ho fana ka ditulo tse kgethehileng tse tshehetsang.
6. Eketsa dihora tsa tshebetso tsa ditlilini mme butle-butle o thehe ditlilini tsa dihora tse 12 le tse 24 bomasepaleng moo tlhoko le mehlodi di dumellang.
7. Ntjhafatsa Tshisaulu Clinic, Makwarela Clinic le Tshidimbini Clinic mme o hahe ditsing tse ntjha tsa bophelo ho atolosa phihlello le ho fokotsa pitlagano.
8. Kenya ditsamaiso tsa dijithale tsa taolo ya bakudi le dipehelo ho fokotsa nako ya ho leta, ho ntlatfatsa bokgoni le ho sireletsa lekunutu la bakudi.
9. Matlafatsa tlhokomelo ya bakudi ka ho qobella maemo a porofeshenale, boitshwaro ba bongaka le ditokelo tsa bakudi ka koetliso e tswelang pele le mehato ya boikarabelo.



10. Hira, koetlisa le ho boloka basebetsi ba bophelo, ho kenyeletsa basebetsi ba bophelo ba setjhaba, baoki le basebetsi ba bang ba ka pele, ho ntlafatsa phihlello ya tlhokomelo ya boleng.
11. Netefatsa hore ditsing tsohle tsa bophelo tsa mmasepala di na le motlakase le metsi a tshepahalang, matla a tshohanyetso le ditshebeletso tsa bohlokwa ho thibela ditshitiso phanong ya tlhokomelo.
12. Ntlafatsa ditsela, ditsela tsa dipalangwang le meralo e tshehetsang e yang ditlilining le ditsing tsa bophelo ho ntlafatsa phihlello ya bakudi, diambulense le ditshebeletso tsa tshohanyetso.
13. Theha diyuniti tsa tshehetso ya bahlaseluo a le ditsi tsa baphonyohi ba tlhekefetso ya bong di-ward, tse fanang ka ditshebeletso tsa bongaka, molao, bopaki ba botlokotsebe, kelello le tshehetso ya setjhaba.
14. Ntlafatsa bophelo ba bomme, bana le pelehi ka koetliso e kgethehileng, ditsing tse ntlafaditsweng, tlhokomelo ya kamora pelehi le mananeo a tshehetso bakeng sa bomme, bana le basebetsi ba bophelo.
15. Netefatsa phepo e tswelang pele ya diphedi tsa bohloeki tsa basadi tsa mahala ditlilining tsa lehae le ditsing tsa bophelo tsa setjhaba.
16. Fana ka ditshebeletso tse kgethehileng, ho kenyeletsa kalafo ya puo le tshehetso ya kgolo bakeng sa bana ba nang le ditlhoko tse kgethehileng.
17. Fana ka tshehetso e lebisitsweng ho dihlopha tse fokotsing, ho kenyeletsa batho ba nang le bokooa, batho ba LGBTQIA+, bafalli, batho ba phelang bofumeng le baphonyohi ba tlhekefetso ya bong.
18. Qobella dipheo tsa nako ya karabelo ya diambulense ya metsotso e sa feteng 20 ditoropong le metsotso e sa feteng 30 mahaeng.
19. Kopanya dingaka tsa setso tse netefaditsweng ditsamaisong tsa bophelo tsa lehae mme o fane ka meralo e nang le seriti bakeng sa phihlello ya meriana ya setso le ya matsoalloa mmoho le tlhokomelo ya sekwalekwale.
20. Theha dirapa tsa meroho tse tsamaiswang ke setjhaba mme di hokahane le ditlilini ho tshehetsa mananeo a phepo le tshireletso ya dijo bakeng sa malapa a fokotsing.
21. Kenya basebetsi ba bophelo ba setjhaba e le basebetsi ba mmasepala ho tsamaisa mananeo a fihlellang malapa ka bophelo, phepo le kgolo ya bana.
22. Haha ditsi tsa mmasepala tsa tsosoloso mme o kenye mananeo a setjhaba a ho lwantsha tshebediso e mpe ya dithethefatsi, haholoholo hara batjha, dibakeng tse hlwauweng mahaeng, ditownship le ditoropong tse kgolo.
23. Sebedisana le dikolo, ditsing tsa bophelo, mekga ya setjhaba le mekgatlo ya baahi ho tsamaisa mananeo a tlhokomediso le thuto ka ditlamorao tse kotsi tsa dithethefatsi, jwala le ho tsuba, ha ho ntse ho kgothaletswa bophelo bo botle.



i) Bomasepala ba EFF ka Eneji le Motlakase

Bomasepala ba EFF ba tla:

1. Nka motlakase e le molemo wa setjhaba wa ntshetsopele, eseng e le mosebetsi wa ho etsa phaello.
2. Emisa ditefiso tse eketsehileng dimithareng tsa tefopele, kenya dimithara tsa tefopele mahala mme o tlose ditlatsetso tse sa hlokahaleng tsa phaello tsa barekisi ba motlakase ba mokga wa boraro.
3. Kgutlisetsa taolo e feletseng ya mmasepala hodima ho lefisa motlakase, kabo le taolo ya lekeno.
4. Matlafatsa pokello ya lekeno ka ditsamaiso tse ntlafaditsweng tsa ho lefisa, dimithara tse bohlale le phethahatso e hlokanang leeme kgahlanong le basebedisi ba sebedisang haholo empa ba sa lefe.
5. Kenya ditsamaiso tsa sekwalelwane tsa dimithara tse sa qhekelleheng mme o etse dikgokelo tsa motlakase mekhukhung hore e be tsa semmuso ho ntlafatsa polokeho le pokello ya lekeno.
6. Atolosa phihlollo ya disebediswa tsa eneji e ntjhafatswang, ho kenyeletsa diphanele tsa letsatsi, digeyser tsa letsatsi le ditsamaiso tsa polokeho ya dibeteri, malapeng a ntseng a emetse motlakase.
7. Hira ka kotloloho dihlopha tsa baenjeneri, basebetsi ba motlakase, ditheknishiene le baartisan ho hlokomela meralo ya motlakase ya mmasepala.
8. Ntlafatsa, atolosa le ho hlokomela diteishene tse nyane tsa motlakase, ditransformer le marangrang a kabo ya motlakase ho ntlafatsa botshepehi le ho fokotsa ho kgaoha ha motlakase ditjhabeng tse sa sebeletswang hantle ho pholletsa le Afrika Borwa.
9. Etelletsa pele ho kenngwa ha motlakase mekhukhung, metseng ya mahaeng le dibakeng tse ding tse sa sebeletswang hantle, ha ho ntse ho atolosa mabone a setjhaba le mabone a dipalo tse telele ho ntlafatsa polokeho.
10. Theha dihlopha tse kgethehileng tsa setegeniki tsa karabelo e potlakileng ho rarolla diphoso le ho kgaoha ha motlakase, ho hloleha ha ditransformer le ho senyeha ha meralo, ka nako ya karabelo ya tshohanyetso e sa feteng hora e le nngwe.
11. Etsa meralo yohle ya motlakase ya mmasepala hore e be ya dijithale, ho kenyeletsa diteishene tse nyane, ditransformer, mehala e fepang, dintlha tsa dimithara le dikgokelo tsa diitsebeletso, ka ditsamaiso tse kopantsweng tse bohlale ho lemoha diphoso, tshenyho le ho qhekella le ho ntlafatsa tlhokomelo le moralo.



12. Fana ka tshehetso e lebisitsweng, mananeo a tsosoloso ya mekoloto le dithulaganyo tsa tefo tse kgonehang ho malapa a nang le mathata a ditjhelete.
13. Thibela ho kgaolelwa motlakase ho sa hlokahaleng ha malapa a nkang karolo mananeong a amohetsweng a phomolo le tsosoloso ya mekoloto.
14. Ntshetsa pele bokgoni ba mmasepala ba ho hlahisa motlakase, ho kenyeletsa diporojeke tsa enoji e ntjhafatswang tsa setjhaba, ka tshebedisano le Eskom le ditheo tse ding tsa setjhaba.
15. Sebedisa tlhahiso ya enoji ya mmasepala ho fokotsa ditshenyehelo tsa motlakase, ho matlafatsa tshireletso ya enoji le ho tshehetsa ntshetsopele ya moruo wa lehae le ho aha diindasteri bocha.

j) Bomasepala ba EFF ka Moruo le ho Aha Diindasteri Bocha

Bomasepala ba EFF ba tla:

1. Tsamaisa ho hahwa ha diindasteri tsa lehae ho fetola bomasepala ho tloha ho ba ditsi tsa tshebediso hore e be ditsi tsa tlhahiso, mesebetsi le diketsahalo tsa moruo.
2. Batla hore ditheo tsa ditjhelete di fane ka matlotlo a laetsweng le ho netefatsa hore bonyane 80% ya disebediswa tsa ditheko tsa mmasepala di fumanwa ka hare ho naha.
3. Buella matlotlo a laetsweng le ditsela tsa ditjhelete tsa ntshetsopele ho lebisa matsete meralong ya motheo ya mmasepala, ho aheng diindasteri le meruong ya lehae e hlahisang.
4. Hlophisa botjha Ditheo tsa Ntshetsopele tsa Bomasepala ho netefatsa hore di tshehetsa ho ahwa ha diindasteri, ntshetsopele ya moruo wa lehae le tlhahiso ya mesebetsi.
5. Theha diphaka tsa diindasteri ditownship le mahaeng tse tsepamisitseng maikutlo tlhahisong, ho sebetsweng ha dihlahiswa tsa temo, disebediswa tsa kaho, ditshebeletso tsa tokiso le makala a mang a tlhahiso.
6. Netefatsa hore Dibaka tsohle tse Kgethehileng tsa Moruo (di-SEZ) le diphaka tsa diindasteri tsa mmasepala di hokahantswe le marangrang a dipalangwang tsa setjhaba a fihlillehang.
7. Ntshetsa pele ditsing tsa tlhahiso tseo e leng tsa mmasepala, dibaka tsa mosebetsi tse arolelwang le meralo ya diindasteri ho tshehetsa di-SMME, dikoporasi le dikgwebu tse ntseng di hlaha.
8. Tshehetsa ho sebetswa ha dihlahiswa tsa temo le diketane tsa boleng tsa lehae tse hokahanyang balemi, bahlahisi, basebetsi ba dihlahiswa le mebaraka indastering ya ditholwana tsa citrus Greater Giyani, Greater Tzaneen le Elias Motsoaledi.



9. Atolosa menyetla ya batho ba batsho, basadi le batjha ya ho nka karolo tlhahisong, beng ba thepa le diketsahalang tsa moruo.

k) Bomasepala ba EFF ka Bodulo ba Batho

Bomasepala ba EFF ba tla:

1. Kenya merero e nang le nako e behilweng ya ho fedisa ho salela morao ha matlo, ka dipheo tse hlakileng tsa selemo le selemo, manane a pepeneneng a ba emetseng matlo le merero ya kabo e ka salwang morao habonolo, ka tshebedisano le mebuso ya diprofinse le ya naha.
2. Ntshetsa pele le ho abela malapa a tshwaneleheng ditsha tse nang le ditshebeletso e le karabelo e potlakileng tlakotsing ya matlo, ha mosebetsi wa ditharollo tsa nako e telele o ntse o tswela pele.
3. Theha rejisetara e kgethehileng ya matlo bakeng sa batho ba nang le bokooa ho ngola le ho sala morao ditlhoko tsa bakopi ba phelang le bokooa, ho netefatsa kabo ya matlo a ba loketseng.
4. Fetola kabo ya tshebediso ya mobu, etsa mekhukhu semmuso le ho e ntlatfatsa, ha ho ntse ho netefatswa phihlello ya ditshebeletso tsa motheo, ditsela, meralo ya metsi a pula le tshireletso ya tokelo ya bodulo.
5. Etelletsa pele ditsha tse nang le ditshebeletso le bodulo bo kopantsweng dibakeng tseo kaho ya matlo e diehileng.
6. Theha le ho matlafatsa ditheo tsa setjhaba tsa matlo a kahisano ho ntshetsa pele, ho ba beng le ho tsamaisa matlo a hiriswang ka theko e kgonehang bakeng sa malapa a basebetsi, batho ba moputso o mahareng le baithuti.
7. Laola le ho tshehetsa mananeo a matlo a theko e kgonehang bakeng sa malapa a sa tshwaneleheng bakeng sa matlo a mahalaempa a sa kgone ho fumana ditjhelete tsa poraefete tsa matlo.
8. Etsa ditlhahlobo tse felleletseng tsa mobu le matlo ho hlwaya mobu o sa sebedisweng, diporojeke tse lahlilweng, meaho e hapilweng le menyetla ya ntshetsopele.
9. Phethela diporojeke tsohle tsa matlo tse emeng le tse lahlilweng ka ho kenella ka kotloloho ha mmuso, taolo e matla ya diporojeke le mehato e tiileng ya boikarabelo.
10. Theha ditsamaiso tse pepeneneng le tse bohareng tsa kabo ya matlo, potlakisa ho ntshwa ha mangolo a beng mme o fedise bobodu phanong ya matlo.
11. Thibela ho lelekwa ka tsela e seng molaong mme o netefatse hore bodulo bo bong bo fanwa moo ho falla ho hlokalahalang.



12. Fetola meaho e sa sebedisweng le e hapilweng hore e be matlo a bolokehileng, a laolwang le a theko e kgonehang moo ho loketseng.
13. Etelletsa pele ntshetsopele ya matlo a batho ba meputso e fapaneng dibakeng tsa ditoropo tse behilweng hantle ho fetola mekgwa ya dibaka ya kgethollo le ho fokotsa ho se lekalekane.
14. Haha bokgoni ba ka hare ba mmasepala ba kaho, fokotsa ho itšetleha ka borakonteraka mme o qobelle ditlamorao tse tiileng bakeng sa mosebetsi wa boleng bo tlase, bobodu le ho lahlwa ha diporojeke.
15. Abela batho bohle ba phelang le bokooa matlo dikgweding tsa pele tse

I) Bomasepala ba EFF ka Botshwasi ba Ditlhapi

Bomasepala ba EFF ba tla:

1. Theha meralo ya ntshetsopele ya moruo wa lewatle dibakeng tsa mabopo, e reretsweng ho sebedisa mehlodi ya lewatle ho hodisa molemo wa moruo bakeng sa ditjhaba tsa lehae dibakeng tse kang Knysna le Mossel Bay Western Cape, iNgquza Hill Eastern Cape le Port Nolloth Northern Cape.
2. Haha mebaraka ya ditlhapi e fihlillehang e nang le ditafale tsa kgwebo ya ditlhapi tsa lehae tse reretsweng ho sebediswa ke batho ba phelang le bokooa.
3. Qala bonyane porojeke e le nngwe ya temo ya ditshedi tsa metsing e leng ya setjhaba nakong ya dilemo tse pedi ho hlahisa menyetla ya mesebetsi e tsitsiseng, haholoholo bakeng sa batjha.
4. Theha Matlole a Kgethehileng a Ntshetsopele ya Botshwasi ba Ditlhapi a Bomasepala ho thusa batshwasi ba ditlhapi ba matsoalloa le ba setso ka diketswana, disebediswa tsa ho tshwasa, polokelo e batang, ditsing tsa ho sebeta dihlahiswa le meralo ya ho paka.
5. Sebedisana le mmuso wa naha ho netefatsa hore batshwasi ba ditlhapi ba lehae iNgquza Hill, ho kenyeletsa Msikaba, Mbotyi, Grosvenor, Mkambathi le Ndlambe Eastern Cape; Knysna Western Cape; le Port Nolloth Northern Cape, ba kenngwa ka tsela e nang le moelelo moruong wa botshwasi ba ditlhapi.
6. Ntshetsa pele temo ya ditshedi tsa metsing le diindasteri tsa botshwasi ba ditlhapi tsa metsi a foreshe ditsamaisong tsa bohlokwa tsa metsi ka hare ho naha, ho kenyeletsa Gariep Dam, Vaal Dam le Bloemhof Dam Free State; le Nandoni Dam, Flag Boshielo Dam le Tzaneen Dam Limpopo, ho atolosa tlhahiso ya dijo, ho hlahisa mesebetsi le ho tshehetsa moruo wa lehae.



7. Thusa dikgwebo tse nyane tsa botshwasi ba ditlhapi le temo ya ditschedi tsa metsing ho ingodisa, ho latela ditlhoko tsa melao le ho fumana mebaraka, ditjhelete le tshehetso ya setegeniki.

m) Bomasepala ba EFF ka Metsi, Tikoloho le Phetoho ya Tlalaemete

Bomasepala ba EFF ba tla:

1. Kopanya ho ikamahanya le phetoho ya tlaemete le botsitso ba tikoloho mererong yohle le diporojekeng tsohle tsa ntshetsopele tsa mmasepala.
2. Netefatsa hore maano le diqeto tsa mmasepala di matlafatsa bokgoni ba ho mamella tlaemete le ho fokotsa ho ba tlakotsing dikotsing tsa tikoloho, moruo le tlaemete.
3. Fana ka diphokotso le dikgothaletso tsa direiti ho malapa le dikgwebo tse tsetelang eneijing e ntjhafatswang le dithekenolojing tse bolokang tikoloho.
4. Theha dibaka tsa mmasepala tsa ho hodisa dimela tsa matsoalloa le ho matlafatsa tshireletso ya mefuta-futa ya ditschedi.
5. Theha dihlopha tse inehetseng tsa meralo ya ikholoji ho sireletsa dibaka tse metsi, dinoka, mabanta a matala le dibaka tse bobebe tsa tikoloho, ho kenyeletsa tse kotsing ya kgoholeho ya mobu.
6. Haha le ho hlokomela diphaka, dibaka tse matala le ditsi tsa thuto ya tikoloho ho kgothaletsa tlhokomediso ya tikoloho le boiketlo ba setjhaba.
7. Lokisa ho dutla ha metsi nakong ya letsatsi le le leng kamora ho tlalehwa mme o thehe dihlopha tse inehetseng tsa diphaephe tsa mmasepala dibakeng tse dutlang haholo.
8. Hlakola mokoloto wa metsi o bokelletsweng ka lebaka la ho lefiswa ka phoso mme o fane ka phomolo e lebisitsweng ya mekoloto ho malapa a tlakotsing, ho kenyeletsa baamohedi ba dipenshene le batho ba nang le bokooa.
9. Netefatsa hore lelapa le leng le le leng le fumana metsi a pompo a hlwekileng, a bolokehileng le a tshepahalang.
10. Haha matlwana a setjhaba le diyuniti tsa dikgwerekgwere tse nang le menyako e sephara, dirampi tse boreledi le sebaka se lekaneng sa ho potoloha bakeng sa basebedisi ba ditulo tsa mabidi.
11. Matlafatsa taolo ya mmasepala hodima meralo ya kabo ya metsi mme o ntlafatse puso ya metsi, tlhokomelo le phano ya ditshebeletso.
12. Kgutlisetsa ditshebeletso tsa diteraka tsa metsi ka hare ho mmasepala mme o lekanyetse tshebediso ya tsona maamong a tshohanyetso feela.



13. Netefatsa hore nakong ya ho fokotswa ha metsi kapa komello, diteraka tsa metsi tsa tshohanyetso di isa metsi ka kotloloho menyakong ya batho ba nang le bokooa, ntle le ho ema meleng ya kabo ya setjhaba.

n) Bomasepala ba EFF ka Dikgwerekgwere le Taolo ya Metsi a Ditshila

Bomasepala ba EFF ba tla:

1. Fedisa matlwana ohle a dibakete le a mekoti e sa bolokehang mme o netefatse phihlello ya bohle ya ditshebeletso tsa dikgwerekgwere tse nang le seriti.
2. Hokahanya malapa le ditsamaiso tsa dikgwerekgwere tse sebetsang mme o fane ka dithekenoloji tse ding moo dikgokelo tse tlwaelehileng di sa kgoneheng hanghang.
3. Netefatsa hore dikolo tsohle, ditlilini le ditsing tsa setjhaba di na le ditshebeletso tsa dikgwerekgwere tse bolokehileng, tse hlwekileng le tse tshepahalang.
4. Fana ka dibaka tsa dikgwerekgwere tse sireletsehileng, tse bonesitsweng hantle le tse hlokometsweng hantle mekhukhung e le mohato wa nakwana ha ditshebeletso tsa ka ho sa feleng di ntse di ntshetswa pele.
5. Theha dihlopha tsa tlhokomelo tsa karabelo e potlakileng ho rarolla ho thibana, ho dutla le ho qhalana ha dikgwerekgwere le ho hloleha ha ditshebeletso.
6. Ntlafatsa, tsosolosa le ho atolosa meralo ya ho hlwekisa metsi a ditshila ho thibela tshilafalo ya dikgwerekgwere le ho sireletsa bophelo ba setjhaba.
7. Haha le ho hlokomela matlwana a setjhaba a hlwekileng, a bolokehileng le a fihlillehang ditsing tsa dipalangwang, mebarakeng, diphakeng, dibakeng tsa boithabiso le dibakeng tse ding tsa setjhaba.
8. Matlafatsa ho latela maemo a naha a boleng ba metsi le taolo ya metsi a ditshila.
9. Tsetela dipatlisisong, boiqapelonyana, ntshetsopeleng ya bokgoni le dithekenolojeng tsa sejwalejwale ho ntlafatsa ditsamaiso tsa dikgwerekgwere le metsi a ditshila.
10. Haha bomasepala ba hlwekileng, ba phetseng hantle le ba nang le seriti, moo ditshebeletso tsa dikgwerekgwere di sireletsang bophelo ba setjhaba, tikoloho le boiketlo ba baahi.



o) Bomasepala ba EFF ka Pokello le Taolo ya Dithole le Bohloeki ba Tikoloho

Bomasepala ba EFF ba tla:

1. Netefatsa ditshebeletso tse tshepahalang tsa pokello ya dithole ditjhabeng tsohle mme o fane ka meralo e lekaneng ya ho lahla dithole dibakeng tsa setjhaba, ditownship, mekhukhung le dibakeng tse nang le batho ba bangata.
2. Fedisa ho lahla dithole ntle le molao ka phethahatso e tiileng ya molao, mananeo a kgafetsa a ho hlwekisa le meralo e ntlafaditsweng ya taolo ya dithole.
3. Amohela le ho kenya Letsholo la Andries Tatane e le lenaneo le inehetseng la ho hlwaya, ho hlwekisa le ho tsosolosa dibaka tsa ho lahla dithole ntle le molao, ha ho ntse ho kgothaletswa ho nka karolo ha setjhaba.
4. Lekola, tsosolosa le ho atolosa dibaka tsa ho lahlela le ho fetisetsa dithole ho netefatsa ho latela maemo a tikoloho le polokeho.
5. Kgutlisetsa mesebetsi ya pokello le taolo ya dithole ka hare ho mmasepala ho matlafatsa bokgoni ba mmasepala le ho fokotsa ho itšetleha ka borakonteraka.
6. Kenya babokelli ba dithole, dikoporasi le dikgwebo tsa ho sebedisa dithole hape ditsamaisong tsa semmuso tsa mmasepala ka tefo e hlokanang leeme le menyetla ya moruo e tsitsitseng.
7. Tsetela ho sebediseng dithole hape, ho eketseng boleng ba tsona le mananeong a moruo wa sedikadikwe ho fokotsa ho itšetleha ka dibaka tsa ho lahla dithole le ho hlahisa mesebetsi e tsitsitseng.
8. Tsetela dipatlisisong, boiqapelonyana, ntshetsopeleng ya bokgoni le dithekenolojeng tsa sekwalekwale ho ntlafatsa ditsamaiso tsa pokello le taolo ya dithole.
9. Sebedisa mananeo a taolo ya dithole le tikoloho ho hlahisa menyetla ya mesebetsi e tsitsitseng bakeng sa ditjhaba tsa lehae.
10. Haha bomasepala ba hlwekileng, ba phetseng hantle le ba nang le seriti, moo ditsamaiso tsa taolo ya dithole di sireletsang bophelo ba setjhaba, tikoloho le boiketlo ba baahi bohle.

p) Bomasepala ba EFF ka Botlokotsebe, Bobodu le Polokeho ya Setjhaba ya Mmasepala

Bomasepala ba EFF ba tla:



1. Ntlafatsa diteishene tsohle tsa sepolesa sa lehae, ditsi tsa tshireletso tsa mmasepala le makgotla a mmasepala ka dirampi tse boreledi, menyako e iketsang, ditafole tsa kamohelo tse tlase le dibaka tsa ho tshwara batho tse fihlillehang.
2. Matlafatsa bokgoni ba phethahatso ya molao ba mmasepala ka basebetsi, koetliso le mehlodi e betere. Hape thusa bomasepala ho amohela mekgwa e loketseng ya phethahatso, jwaloka mafapha a inehetseng, ditshebeletso tse arolelwang kapa diyuniti tse matlafaditsweng tsa melawana ya mmasepala.
3. Sebedisana le Tshebeletso ya Sepolesa sa Afrika Borwa le bankakarolo ba bang ho theha maano a kopantsweng a thibelo ya botlokotsebe a thehilweng dibakeng tse hlauweng tsa botlokotsebe bo phahameng.
4. Kenya Lenaneo le Lebisitsweng la Karabelo ho Tlhekefetso ya Bong le Polao ya Basadi Seteisheneng sa Sepolesa sa Thohoyandou, se tlalehileng palo e phahameng ka ho fetisisa ya dipeto.
5. Kenya Lenaneo la Mmasepala o Bolokehileng le tsepamisitseng maikutlo thibelong ya botlokotsebe, phethahatsong ya melawana le dibakeng tse bolokehileng tsa setjhaba.
6. Matlafatsa le ho atolosa diforamo tsa lehae tsa thibelo ya botlokotsebe ho ntlafatsa tshebedisano pakeng tsa bomasepala, ditjhaba, meaho ya sepolesa sa setjhaba le ditheo tsa phethahatso ya molao. Mosebetsi ona o tla etelletswe pele Umzumbe (Ward 19), Umlazi (Di-ward 76 le 78), Maphumulo (Ward 4), uMshwathi, Mandeni, eThekwini Outer West (Di-ward 2, 4, 5, 8 le 91), eThekwini Far North (Di-ward 59, 102 le 112) le eThekwini Central KwaZulu-Natal; Breede Valley, Mitchells Plain le Philippi City of Cape Town, Western Cape; le City of Johannesburg Gauteng.
7. Tshehetsa matsapa a thibelo ya botlokotsebe a etelletswe pele ke setjhaba ka phihlelo ya dibaka tsa mmasepala, ditirisano le mefuta e meng e loketseng ya thuso.
8. Theha makgotla a mmasepala ho ntlafatsa phethahatso ya melawana ya mmasepala le ho fokotsa tieho tsamaisong ya toka.
9. Sebedisa dithekenoloji tsa sejwalejwale tsa ho lwantsha botlokotsebe, ho kenyeletsa dikhamera tsa CCTV, di-drone, ditsamaiso tsa ho lemoha modumo wa dithunya le ditsi tsa tlhokomelo ya nako ya nnete.
10. Theha mananeo a inehetseng a polokeho ya mahaeng ho lwantsha boshodu ba mehlape, tshenyo ya meralo le botlokotsebe bo bong Matatiele, Ntabankulu, Mbhashe le Winnie Madikizela-Mandela Municipality Eastern Cape; Umzimkhulu, Jozini le uMhlabyalingana KwaZulu-Natal; Ngwathe, Mafube le Kopanong Free State; Ramotshere



Moiloa le Ditsobotla North West; Musina le Makhuduthamaga Limpopo; le Joe Morolong le Ga-Segonyana Northern Cape.

11. Etsa ditlhahlobo tsa mokgwa wa bophelo wa basebetsi ba mmasepala mme o qobelle ditlamorao tse tiileng kgahlanong le bobodu le diketso tse fosahetseng tsamaisong ya mmasepala.
12. Haha bomasepala ba bolokehileng, ba sireletsehileng le ba tsamaiswang hantle ba sireletsang baahi, dikgwebo le meralo ya setjhaba.

q) Bomasepala ba EFF ka Ntshetsopele le Matlafatso ya Batjha

Bomasepala ba EFF ba tla:

1. Boloka direkoto tse netefaditsweng tsa batjha ba sa sebetseng ho tiisa phihlello e hlokanang leeme le e pepeneneng ya mesebetsi ya mmasepala, koetliso, dibasari le mananeo a tshehetso ya dikgwebo.
2. Netefatsa hore bonyane 40% ya menyetla ya mesebetsi ya mmasepala e abelwa batjha ba dilemo tse 18 ho isa ho 35, haholoholo meralong ya motheo, ditshebeletsong tsa setegeniki, taolong ya dithole, eneijing, metsing le ditshebeletsong tsa setjhaba.
3. Abela bonyane 50% ya menyetla ya ditheko tsa mmasepala ho dikgwebo le dikoporasi tsa batjha ka tshehetso e lebisitsweng, ho arolwa ha dikonteraka le ditefo tse potlakileng.
4. Koetlisa le ho etsa batjha ba porofeshenale jwaloka baartisan, ditheknishiene le basebetsi ba bang ba nang le bokgoni ka mananeo a mmasepala a boithutelo, di-internship le ntshetsopele ya bokgoni.
5. Fana ka koetliso ya mahala ya laesense ya ho kganna le monyetla o le mong wa teko ya laesense ho batjha ba sa sebetseng le ba qetileng materiki.
6. Theha Ditsi tsa Menyetla ya Batjha le ditshebeletso tsa tshehetso tsa diward ho fana ka tataiso ya mesebetsi, tshehetso ya kgwebo, thuso ya khiro, phihlello ya dijithale le tshehetso ya dikopo tsa mesebetsi, koetliso le kgwebo.
7. Hlophisa botjha mananeo a mmasepala a khiro ya batjha, jwaloka Expanded Public Works Programme (EPWP), ho kenyeletsa mesebetsi e loketseng batjha ba nang le bokooa ba mmele.
8. Romela bafetoleli ba koetlisitsweng ba Puo ya Matsoho ya Afrika Borwa (SASL) dipontshong tsohle tsa mesebetsi, dithupelong tsa batjha le tsa kgwebo tse tshwarwang ke mmasepala.
9. Matlafatsa mananeo a batjha a thibelo ya tshebediso e mpe ya dithethefatsi le ho tshehetsa matsapa a tsosoloso a setjhaba ka dibaka tsa mmasepala le tshehetso ya mekgatlo ya setjhaba.



10. Fana ka phihlello ya dibaka tsa kgwebo, dibaka tsa mmasepala, meralo le ditshebeletso tsa tshehetso ya kgwebo ho borakgwebo ba batjha, barekisi ba seng molaong le dikoporasi.
11. Etelletsa pele dibasari tsa mmasepala tsa bokgoni bo haellang le ba setegeniki mme o netefatse hore baithuti ba fumaneng mangolo ba kenya letsoho ho aheng bokgoni ba mmasepala.
12. Sebedisa dikgothaletso, ditumello le mananeo a ntshetsopele ya moruo a mmasepala ho kgothaletsa khiro e eketsehileng ya batjha meruong ya lehae.
13. Phatlalatsa ditlaleho tsa kgafetsa ka khiro ya batjha, ditheko, koetliso, dibasari le ntshetsopele ya dikgwebo ho netefatsa pepeneneng le boikarabelo.

r) Bomasepala ba EFF ka Dipalangwang

Bomasepala ba EFF ba tla:

1. Hlokomela ditsela tsohle tsa mmasepala hore di bolokehe le ho sebediseha mme butle-butle o kenye bokahodimo ditseleng tsa kerabole ho netefatsa phihlello e tshepahalang maemong ohle a lehodimo Mogale City, Rand West Gauteng le Khai-Ma Northern Cape.
2. Netefatsa ka potlako ho tshelwa kerabole tseleng ya R524 ho tloha Louis Trichardt/Makhado, ho feta Thohoyandou ho ya Punda Maria Gate ya Kruger National Park.
3. Etelletsa pele tlhokomelo le ntlafatso ya ditsela tse yang dikolong, ditlilining, mabitleng, ditsi tsa moruo le dibakeng tse ding tsa setjhaba.
4. Netefatsa hore direnke tsa ditekesi, diteishene tsa dibese le diterene le dibaka tse ding tsa dipalangwang tsa setjhaba di hlwekile, di bolokehile, di bonesitswe hantle mme di na le metsi, dikgwerekgwere le ditshebeletso tsa ho tlosa dithole.
5. Hlomella dipalangwang tsohle tsa setjhaba tsa mmasepala ka ditsebiso tsa lentswe le dipontsho tsa dijithale tse bonahalang ho phatlalatsa dibaka tse latelang tsa ho ema le ditsela.
6. Etsa ditirisano tsa semmuso le mekgatlo ya ditekesi ho tsamaisa mmoho direnke, dibaka tsa setjhaba le meralo ya bapalami ka tsela e tshehetsang dipalangwang tse bolokehileng le tse sebetsang hantle.
7. Hlophisa direnke le dibaka tsa dipalangwang e le dibaka tse hlophisitsweng tsa kgwebo tse tshehetsang barekisi ba seng molaong le moruo wa lehae.



8. Kenya ditsamaiso tse pepeneneng le tse sebitsang hantle tsa ho fana ka diphemiti tsa ditekesi le ditumello tse ding tsa dipalangwang tsa mmasepala.
9. Kenya meralo ya sekwalekwale ya polokeho, ho kenyeletsa mabone, ditsamaiso tsa tlhokomelo le mehato ya tshireletso direnke le diteisheneng tsa dibese le diterene.
10. Atolosa ditshebeletso tsa dipalangwang tsa setjhaba tse tshepahalang le tse kgonehang, ho kenyeletsa dibese tsa mmasepala le tsa konteraka, haholoholo ditownship le mahaeng a sa sebeletswang hantle.
11. Netefatsa hore ditekesi ha di nkuwe ke basebetsi ba phethahatso ya molao ba mmasepala ntle le lebaka kapa ka tsela e seng molaong.
12. Fana ka dithuso tsa ditjhelete tsa ho hlwekisa le ho hlokomela ho mekgatlo ya ditekesi, dikoporasi le dikgwebo tsa setjhaba tse tsamaisang direnke, matlwana a setjhaba le dibaka tsa bapalami.
13. Fana ka tshehetso ya dipalangwang e bolokehileng, e tshepahalang le e thuswang ka ditjhelete ho baamohedi ba dipenshene, batho ba nang le bokooa le ba sa sebitseng.
14. Fana ka dipalangwang tse bolokehileng le tse tshepahalang ho maqheku a amohelang SASSA matsatsing ao a nkang dipenshene le dithuso tsa setjhaba.
15. Etsa ditlhahlobo tsa kgafetsa tsa meralo ya dipalangwang tsa mmasepala le dikonteraka tse amanang ho netefatsa hore mehlodi ya setjhaba e tshehetse ditshebeletso, moruo le ditlhoko tsa setjhaba.
16. Tsosolosa le ho hlokomela maemafofane a mmasepala mme o ntshetse pele meralo e menyane ya difofane moo ho kgonehang.
17. Etsa bomayara, di-MMC le basebetsi ba mmasepala hore ba ikarabelle ka boemo ba ditsela, meralo ya dipalangwang le dibaka tsa dipalangwang tsa setjhaba.
18. Qobella melawana ya mmasepala ho netefatsa hore basebedisi bohle ba dipalangwang ba sebitsa ka molao le ka boikarabelo, ba sireletsa bapalami, dikgwebo le ditjhaba.



s) Bomasepala ba EFF ka Meralo ya Motheo ya Mmasepala

Bomasepala ba EFF ba tla:

1. Haha botjha bokgoni ba ka hare ba mmasepala ka ho hira baenjenere, barulaganyi ba ditoropo, baqapi ba meaho, baartisan, basebetsi ba diphaephe, ditheknishiene le ditsebi tse ding tse hlokahalang ho rala, ho aha le ho hlokomela meralo.
2. Fedisa ho ntshwa kantle ha ditshebeletso tsa bohlokwa tsa meralo mme o thehe dihlopha tsa ka ho sa feleng tsa mmasepala tse ikarabellang bakeng sa ditsela, metsi, dikgwerekgwere, metsi a pula le dibaka tsa setjhaba.
3. Qala lenaneo le leholo la ho aha meralo botjha ho rarolla ho salela morao ha ditsela, metsi, dikgwerekgwere, ditsamaiso tsa metsi a pula le dibaka tsa setjhaba.
4. Sebedisa ntshetsopele le tlhokomelo ya meralo e le mkganni e moholo wa khiri, ho tsepamisitswe maikutlo ho basebetsi ba lehae, basadi, batho ba nang le bokooa le batjha.
5. Hlokomela le ho ntlafatsa ditsela tsa mmasepala, marokho, mabone a sephethephethe, mabone a diterata, matshwao a ditsela le ditsamaiso tsa metsi a pula ho netefatsa motsamao o bolokehileng le o tshepahalang wa batho le thepa.
6. Lokisa, atolosa le ho hlokomela meralo ya metsi, ho kenyeletsa diphaephe, matamo a polokelo le ditsing tsa tlhoekiso, ho netefatsa phepele e tshepahalang le ho fedisa tahlehelo e bakwang ke ho dutla le tlhokomelo e mpe.
7. Ntlafatsa le ho hlokomela meralo ya dikgwerekgwere, ho kenyeletsa ditsamaiso tsa diphaephe le ditsing tsa tlhoekiso ya metsi a ditshila, ho fedisa ho qhalana le ho netefatsa ditshebeletso tse nang le seriti bakeng sa ditjhaba tsohle.
8. Etelletsa pele ntshetsopele ya meralo mekhukhung, ditownship, mahaeng le dibakeng tse ding tse kileng tsa hlokomolohuwa.
9. Hlokomela le ho matlafatsa meralo dibakeng tsa bodulo, kgwebo le diindasteri ho tshehetsa malapa, dikgwebo le ditsebi le ho hodisa moruo wa lehae.
10. Netefatsa hore meralo ya mmasepala e tshehetsa ho ahwa ha diindasteri, matsete, kgolo ya moruo le katoloso ya dikgwebo tsa lehae.
11. Netefatsa hore matsete a meralo a hokahana le moralo wa dibaka, bodulo bo kopantsweng le dipheo tsa nako e telele tsa ntshetsopele ya mmasepala.



F. HO RALA TEKANYETSO LE HO TSHEHETSA BOMASEPALA BA BATHO BA EFF KA DITJHELETE

Puso ya lehae e maqakabetsing ka lebaka la tsamaiso e mpe le tshenyo ya ditjhelete bomasepaleng ba etelletseng pele ke ANC, DA le IFP, tse senyang phano e nepahetseng ya ditshebeleto. Ho hlokahala mokgwa o motjha wa tekanyetso le ditjhelete, ho matlafatsa bokgoni ba tsamaiso le ho netefatsa hore baetapele ba etelle tsa ditjhaba pele.

Hona jwale bomasepala ba fumana hoo e ka bang 9% ya ditjhelete tse abelwang mebuso ya naha, diprofinse le ya lehae ke Palamente. EFF e tla tswela pele ho buella Palamenteng hore kabelo ena e eketswe ho bonyane 15%, ho lokolla mehlodi e mengata bakeng sa ditsela, metsi, motlakase le matlo.

Bomasepala ba Batho ba EFF ba tla theha Diyuniti tsa Tlhokomelo ya Setegeniki ya Dithuso tsa Meralo. Diyuniti tsena di tla ba le baenjenere, baqapi ba meaho, barulaganyi ba ditoropo, baartisan le bahlahlobi ba ditjhelete ba sebetsang ka nako e tletseng ho netefatsa hore dithuso tsa meralo, tse atisang ho lahleha ka lebaka la kgokahano e mpe le bobodu, di sebediswa hantle.

Bomasepala ba Batho ba EFF hape ba tla sebedisana le dikgwebo ho aha ditsela, ditsamaiso tsa metsi, motlakase, matlo le meralo ya dijithale, ha thepa ena e bolokwa matsohong le beng ba batho.

Bomasepala ba Batho ba EFF ba tla etsa ditumellano le dikgwebo tsa lehae ho tshehetsa tlhokomelo ya meralo, ho kenyeletsa ho lokisa ditselana tsa maoto le mekoti, ho beha meqomo ya dithole dibakeng tsa tsona le ho hlwekisa dibaka tsa setjhaba.

Hape ba tla abela mekgatlo ya ditekesi ditjhelete tsa ho hlwekisa le ho hlokomela direnke, ditsela tsa dipalangwang le matlwana a setjhaba. Ho feta moo, Bomasepala ba Batho ba EFF ba tla bokella tjhelete eo ba e kolotwang ke dikgwebo tse kgolo le mafapha a mmuso.

Dibilione tsa diranta di lahleha selemo le selemo ka tshenyo ya metsi le motlakase e bakwang ke meralo e sa hlokomelwang hantle. Bomasepala ba Batho ba EFF ba tla lokisa meralo le ho kenya dimithara tse bohla ho sireletsa lekeno la mmasepala.

Ho latela Mohlahlobi-Kakaretso wa Afrika Borwa, bomasepala ba sebedisitse ho feta R1.6 bilione ho baeletsi selemong sa ditjhelete sa 2024/25. Bomasepala ba



Batho ba EFF ba tla etelletsa pele bokgoni ba ka hare ka ho hira ditsebi tse nang le mangolo a loketseng ho fapana le ho itšetleha ka baeletsi, ho netefatsa tshebediso e sebetsang hantle ya ditjhelete tsa setjhaba.

Beng ba dikgwebo ba bangata ba thatafallwa ke ho aha difeme hobane ha ba na mobu. Bomasepala ba Batho ba EFF ba tla fana ka mobu wa mahala ho beng ba dikgwebo bakeng sa ho aha difeme le ho hlahisa mesebetsi.

G. QETELLO

Kajeno Afrika Borwa e tobane le kgetho e ke keng ya hlola e chechiswa. Ke kgetho pakeng tsa Tlhōlo kapa Lefu. Ho putlama ha bomasepala ba rona le ho hloleha ha puso ya lehae ha ho ame feela diphaephe tse robهيلeng, mekoti ditseleng, pokello ya dithole, metsi le phepelo ya motlakase.

Ho ama maphelo a letsatsi le letsatsi a batho ba rona. Ho ama mme wa Giyani ya sa kgoneng ho hlatswa le ho phehela bana hobane ho se na metsi. Ho ama batjha ba Soweto le Mamelodi ba sa fumaneng mesebetsi mmasepaleng hobane ba se na dikgokahano tsa dipolotiki. Ho ama ngwanana wa Mthatha ya qobellwang ho robala le mokhanselara kapa Meyara hore a fumane mosebetsi. Ho ama batjha ba Khayelitsha le Mitchells Plain ba inehetseng dithethefatsing le jwaleng ka lebaka la tlhokeho ya mesebetsi.

Ho ama basebetsi le baamohedi ba dipenshene Rustenburg ba lefellang ditshebeletso tseo ba sa di fumaneng. Ho ama bana Mangaung ba fetang pela dikgwerekgwere tse tsholohang le ditsela tse nang le mekoti ha ba ya sekolong.

Batho ba rona ba utlwile ditshepiso tse lekaneng Umlazi le KwaMashu. Ba mametse dipuo tse lekaneng Nkomazi le Mbombela. Ba badile dimanifesto tse lekaneng. Seo Afrika Borwa e se batlang jwale ke boitlamo ba nnete.

Boitlamo bo manifestong ona hase ditshepiso tse se nang letho. EFF e a tseba hore batho ba rona ba kgathetse ke ditshepiso. Ke boitlamo boo EFF e tla bo phehella ka kgalemo, botshepehi le boikemisetsa.

Manifesto ona ke phatlalatso ya hore puso ya lehae e ka sebetsa. Ke phatlalatso ya hore bomasepala ba ka ba ditsi tsa bokgabane le phano ya ditshebeletso ho batho ba rona, ntle le bobodu.

Boitlamo bo bong le bo bong bo manifestong ona bo a sebetsa ebile bo ka lekannngwa.



Ke boitlamo ba ho netefatsa hore ha ho ngwana Emfuleni ya holang a nahana hore dikgwerekgwere diterateng ke ntho e tlwaelehileng, ha ho lelapa Lusikisiki le amohelang lefifi e le boemo ba ka ho sa feleng, mme ditjhaba tsa Polokwane le Phokwane ha di qobellwe ho phela ntle le ditshebeletso tsa motheo le seriti.

Nnete ke hore tokoloho ya nnete e ke ke ya ba teng ntle le bomasepala ba sebetsang. Seriti se ke ke sa ba teng moo metsi a sa phalleng, motlakase o sa tshepahalang, ditsela di sa bolokehang le ditlilini di sa kgoneng ho sebeletsa bakudi.

Boitlamo bo bong le bo bong bo manifestong ona bo na le boima. Ke boitlamo ba ho kgutlisetsa boikarabelo moo bo sentsoeng le ho netefatsa hore boteng ba puso ya lehae bo utlwahala maphelong a letsatsi le letsatsi, eseng dipuong kapa mehoo.

Mosebetsi o ka pele o ke ke wa ba bonolo. O tla hanyetswa ke ba ruang molemo ho putlameng ha bomasepala, bohlokong ba batho ba rona le boemong ba hajwale.

Batho ba Ekurhuleni, Johannesburg, Tshwane, Mangaung le Nelson Mandela Bay. Basebetsi ba Cape Town, eThekweni le Buffalo City. Batho ba Afrika Borwa.

Re hlahisa Manifesto oa Likhetho tsa Puso ea Lehae tsa 2026 e le boitlamo ba dilemo tse hlano ba ho aha Bomasepala ba Batho ba tla tlisa Tokoloho ya Moruo.

Tlhōlo kapa Lefu, voutela EFF!
Sehlomathiso A:

H. SEHLOMATHISO A: KANO YA MOKHANSELARA WA EFF

Nna, _____, ka boithaopo ke amohela ho romelwa ke Economic Freedom Fighters jwaloka Mokhanselara pusong ya lehae.

- Ke ikana ka tieo ho sebeletsa batho ba Afrika Borwa ka kgalemo, botshepehi, boitshwaro le boitlamo ba phetohelo.
- Ke utlwisisa hore ho romelwa hase tokelo kapa mosebetsi, empa ke boikarabelo le taelo ya mokgatlo.
- Ke ikana ka tieo ho ba Mokhanselara ya tshepahalang ho setjhaba sa ka le batho ba Afrika Borwa.
- Ke inehela ho sebeletsa setjhaba sa ka dihora tse 24 ka letsatsi.



- Ke tla dula ward ya ka nakong yohle ya nako ya ka ya tshebetso mme nke ke ka falla.
- Nke ke ka ameha bobodung kapa boshodung.
- Nke ke ka ameha bobodung ba manane a matlo.
- Nke ke ka ameha bobodung ba ditsamaiso tsa khiro.
- Nke ke ka etsa kgwebo le mmasepala kapa ho nka karolo dithendareng.
- Nke ke ka etsa Tlhekefetso e Thehilweng Bong kapa boitshwaro bo tshwanang bo hatakelang seriti le ditokelo tsa motheo tsa botho tsa basadi le bana.
- Nke ke ka sebedisa dintho tse tahang kapa ho bonwa ke tahlilwe phatlalatsa.
- Ke tla lefa ditekiso tsa mokgatlo wa ka ka botlalo le ka nako kgwedi le kgwedi mme nke ke ka hloleha boikarabelong bona.

Ke amohela hore haeba nka tlola boitlamo bona, Molaotheo wa EFF, Manifesto wa Motheo, Molawana wa Boitshwaro kapa ditaelo tsa mokgatlo, Economic Freedom Fighters e tlameha ho mpitsa hape le ho ntlosa ho romelweng jwaloka Mokhanselara.

E SAENILWE _____ ka letsatsi lena la bo__ la _____ 2026.

MOKHANSELARA

Tshaeno: _____

MO BOEMONG BA ECONOMIC FREEDOM FIGHTERS

Mosaeni ya Dumeletsweng: _____

Tshaeno: _____

PAKI 1

Lebitso: _____

Tshaeno: _____

PAKI 2

Lebitso: _____

Tshaeno: _____